

海岱史略

109-113

九

海岱史略目錄

金臣傳卷之一百九

張萬公

徒單克寧

張曄行簡

行信

侯摯

耿端義

賈鉉

孫鐸

金臣傳卷之一百十

范拱

趙鑑

劉璣

賀揚庭

黃久約

鄒谷

任天寵

李英

高竑

金忠義傳卷之一百十一

張順

楊敏中張乞驢

李演

高霖

馬驤

烏古論德升

商衡

蒲察琦

毛佺

金儒林傳獨行附

孝友附文苑附

高士附卷之一百十二

孔璿

孔端甫魏汝翼
王樞

張安行翟駒
趙擊傳礪
張涓

王琛

王震劉瑜

王去非

郭長倩

党懷英

趙渢

宋九嘉

金附傳卷之一百十三

紀天錫

李上達

馬定國

海岱史略卷之一百九

金臣傳

安邱王馭超約齋

張萬公字良弼東阿人生時父彌學夢至一室榜曰張萬相公讀書堂因以名焉幼聰慧喜讀書正隆二年登第歷新城費縣簿遷長山令土寇萬人至城倉卒登陴諭以誠意衆感悟散去邑人爲立生祠累遷侍御史右司郎中丞相徒單克寧許以當代我後世宗悅其敦表明敏稱爲純直人遷刑部侍郎章宗選爲南京路提刑使以治最遷御史中丞北邊有警命發兵擊之萬公言勞民非便遂罷兵明昌二年知大興府事拜叅知政事以母老賜告省親還問山東河北雨未霑足上語宰臣奈何萬公進曰依漢法臣等皆當免官上曰卿等何罪殆朕所行有不逮者對曰天道與人事

實相感通惟聖人言行可以動天地昔成湯周宣莫不脩飾人事
方今宜從節儉不急之務無名之費可俱罷去於是以萬公所言
下詔罪己時進士李邦入上封事論世俗侈靡譏涉先朝命有司
議罪萬公言譏斥先朝固當治罪但舊無此法令宜定立使人知
之邦又乃得免罪四年乞侍養特命知東平府諭以卿在政府稱
職朕心所屬特遂孝養不汝忘也萬公頓首泣謝六年改知河
府時軍興調發叢劇悉為寬假使民力易辦人為繪像於薰風樓
又建去思堂母憂詔起復拜平章政事封壽國公時帝惑李沆
有寵用事削罷諫官遣事方殷連歲旱災又紛更制度民謂弗便
獨萬公沉厚謹務安靜少事與同列議多不合頗畏嫌忌不敢

犯顏諫諍上有問然後審畫利害而質言之帝雖從而弗行也因
丙二表以哀病旬間賜告兩月詔諭近卿言數事未行乃朕之過
卿年未老復起視事上言明昌間役民數萬沿臨潢泰州開築壕
塹連年未就所開旋為風沙所平無益禦侮而徒勞民宜罷之又
主兵者歸罪屯田地少不免飢寒故比歲征伐軍多敗衄請括民
田之冒稅者分給之方今軍旅之後瘡痍未復百姓拊摩不暇何
可重擾矧通檢未久田有定籍括之必不能盡適足以增豪猾之
弊長告訐之風必不得已乞以冒地之稅所入贍軍兼推侈用浮
費可以斂不及民而無待於奪民之田矣皆不報連章請老不許
泰和元年加榮祿大夫仍賜其子及第明年復謝病歷舉朝臣自

代求去甚力上勉從之加金紫光祿大夫致仕六年南鄱用兵特
起知濟南府充山東路安撫使遇連歲旱蝗沂密萊莒濰五州尤
甚萬公奏恐民飢盜起乞將僧道度牒并鹽引付山東行部納粟
易糧又上督責有司禁戢盜賊之方上皆從之宋人請和許復致
仕加崇進給平章半俸七年卒命依宰臣例燒飯賻葬贈儀同三
司諡曰文貞萬公淳厚剛正門無祿賓典章文物多所裁正上嘗
與司空襄言秋山之樂意將有事春蒐顧視萬公對曰動何如靜
上改容而止輔政八年所薦引多廉讓之士大安元年配享章宗
廟廷

徒單克寧本名習顯先由金源縣徙居比古土之地後置猛安命

諸路以三百戶為謀克以十謀克為猛安於山東遂占籍萊州父況者尚宗女官至汾

陽軍節度使克寧資質渾厚寡言笑善騎射有勇畧娶宗幹女嘉祥縣主母舅希尹薦於熙宗以充護衛累遷侍衛親軍馬步軍都指揮使歷忠順軍胡里改路節度使曷懶路兵馬都總管大定初詔遷左翼都統以本路兵會窩幹討契丹賊四百餘騎欲繞陣後攻我克寧與善射二十餘人盡力奮擊賊乃却復追及於霧霖河殺傷甚衆時窩幹已再北世宗訪大軍久駐遣問謀衍歸咎騎弱欲增益萬騎克寧奮言吾馬固不少但帥不得其人常利鹵掠賊至則引避去則緩隨之故賊恒得善牧我反拾其蹂踐之餘此吾馬所以弱也誠更置良帥雖不益兵可以有功乃以僕散忠義兼

都元帥賊乞降克寧曰賊無降意是欲緩吾師期不若攻其未脩
賊若挫衄其降必速如其不降乘其怠而急擊之可一戰而定也
忠義然之遂敗賊於羅不魯之地賊奔七渡河負險為柵克寧覘
知柵背可上潛師夜登俯射之大軍自下攻賊潰遁去事平除太

原尹

宋

吳璘侵陝徒單合喜乞益兵詔遣克寧叅議軍事此人智勇

足敵萬人不必益軍乃佩金牌駐平涼下令安輯民皆完聚治兵
伐宋出軍楚泗之間宋將魏勝取敵舟鑿其底貫以大木列植水
中別以船載巨石貫以鐵鑠沉之水底以塞淮口克寧選善游者
沒水繫大繩植木上皆拔出之徹去沉船進至淮口宋遣步兵四
萬隔水拒戰猛安長壽先行薄岸敗其步兵師遂渡淮進與大兵

拒戰自旦至午宋兵敗走還營中射以火箭營舍盡焚宋兵不能
為陣猛安賽剌率騎橫擊之宋兵大敗射殺魏勝遂取楚州及淮
陰縣時宋屢遣使請和意尚遷延及是大^始懼一如期約兵罷召為
都點檢十二年遷樞密副使俄拜平章政事封密國公以女為潯
王永成妃得罪罷為東京留守未幾復平章政事世襲不礼土河
猛安兼親管謀克宗族多在山東恐官田少無以盡給選其最親
者徙之十九年拜右丞相在相位持正守大體至簿書期會不屑
屑然二十一年轉左丞相徙封定國公未幾進司徒世宗幸上京
留輔太子及太子薨身護宮門嚴飭殿庭禁衛如法諸王妃主宗
室外戚入臨從者皆有數語東宮官屬當以死報國吾亦不敢愛

其生辭色俱厲聞者肅然召諭侍讀完顏匡爾侍太子日久金源
郡王哀毀過甚爾當固諫身居家嗣豈以哭泣常禮而忘宗社之
重乎尤宜謹視勿去左右世宗聞之嘉其忠誠駕還表請立皇太
孫以係天下之望事貴果斷不可遲緩萬一寡愼恐左右譏邪或
起覬覦骨肉之禍自此始矣時世宗諸子趙王永中最長且與克
寧有親上歎以為真社稷臣踰月詔起復皇孫原王為右丞相拜
克寧太尉兼左丞相使輔導之上以中外皆患錢少欲令郡縣盡
運錢至京師克寧曰若是民間錢益少矣不若起運其半以半變
折輕齎庶幾錢貨流布也上嘉納之十一月八日見率宰臣屏左右
又奏立太孫世宗許之因宴慶和殿語諸王大臣太尉忠實明達

漢周勃也稱歎再三明年正月因思念鄉土求解機務詔許其往
不必謝政四月還監修國史上因盧溝河決久不能塞加封安平
侯水復故道以為神佑也克寧奏神之所佑者正也報應之來皆
由人事人事乖則弗享矣宗主殂遣使進遺留物上怪其薄克寧
言此非常貢賁之近於好利上皆是其言欲賜甲第固辭更賜錢
宏其舊居畢工臨幸賜金器錦繡克寧亦有所獻上飲懽甚親解
御衣服之畫其像藏於內府世宗不豫率宰執入問進兼尚書令
封延安郡王命宣遺詔立皇太孫章宗即位徙封東平郡王諭尚
書省太傅年高自今朔望朝日設坐殿上固辭侍立益恭進拜太
傅詔譯諸葛孔明傳以賜加冠調攝大事錄之細事不須親也上

頗好詞章尚書省奏猛安謀克願試進士者聽克寧謂承平日久
今之猛安謀克材武已不及前習辭藝忘武備於國弗便上是其
言明昌元年屬疾駕往視即榻前拜太師封滹王加賜甚厚二年
正月薨遺表言不及私勸帝無重君子而內踈之輕小人而終昵
之惟願慎終如始安不忘危詔有司護喪事歸葬萊州謚曰忠烈
五年配享世宗廟庭圖像衍慶宮

張暉字明仲莒州日照人博學諳通登正隆五年進士歷昌樂永
清二令累皇太孫左贊善大夫擢左諭德元宋國報哀使至時始
宋人請赴宴辭以大行在殯受賜亦不舞蹈時服其知禮使還遭
太常少卿兼修起居注奏唐制宰相入閣諫官隨之欲其預聞政

事有所開說每帝臨朝起居郎並舍人左右對立有命則臨階俯
聽退而書之比乃一例迴避雖香閣奏陳亦不令侍凡有聖訓及
所議政事臣等無緣得知似非設官本意若漏洩政事自應坐罪
上從之遷右諫議大夫兼禮部侍郎明昌元年太傅徒單克寧薨
上欲親為燒飯暉奏聖慈恩禮勲臣孰不感動但孝懿皇后梓宮
在殯太祖時享尚且權停況於臣子禮有未安乃止進拜尚書奏
言提刑司不可罷因舉漢刺史六條以奏上曰卿言與朕意合六
年復兼太常卿辰進大金儀禮承安元年八月召問南郊大祀用
度不給可俟他年乎對曰陛下即位於今八年大禮未舉宜亟行
之上曰北方未寧致齋之際設有奏報何以處之對曰豈可逆料

小變而妨大禮矧今河平歲豐正其時也從之上問僧道三年一試八十取一不亦少乎對曰此輩浮食無益有損不宜滋多上曰周武帝唐武宗後周世宗皆賢君其壽不永似亦有因對曰三君矯枉太過今不毀除不崇奉是為得中三年擢御史大夫懇辭不許明年坐奏事不實奪官復起為安武軍節度使致仕卒諱為人清靜寡慾早喪妻室後不復娶亦無姬侍齋居與二子講論古今詢孫課誦夜分乃罷以為常居官不附權貴自為太常禮部二十餘年最明古今禮學家法為士族儀表

子行簡字敬甫穎悟力學淹貫經史大定十九年進士第一除應奉翰林文字丁母憂歸葬益都杜門讀書人莫見其面服除復官

章宗即位攝太常博士時夏國遣使陳慰欲致祭大行靈殿行簡
言非專使不可遣使高麗報哀以細故邀阻且出嫚言會當橫賜
請俟移問還報行尚未晚徒單克寧題其言轉翰林修撰遷翰林
直學士同修國史拜禮部侍郎奏言令雖有國朝集禮至於食貨
官職兵刑沿革未有成書乞定會要以示無窮遷侍講學士泰和
二年為宋^主生日副使上召正使完顏瑋戒以每事聽於行簡四年
詔每奏事須令張行簡常在左右時羣臣屢請上尊號令作批答
行簡言宋司馬光嘗諫此事不若范祖禹臣謂臣子生謚君父頗
似慘切上令用祖禹意答之不拘對偶其文深雅甚得代言之體
遷順天軍節度使諭曰在任半歲或一年所得利害上之未幾上